

庾子山全集

掃葉山房發行

泉唐倪璠魯玉註釋

庾開府全集

掃葉山房發行

民國十四年石印



掃葉山房商標

張天如先生原序

婁東張溥題

周滕王道序庾開府集云子山妙擅文詞尤工詩賦誅潘安而碑蔡邕歲楊雄而書阮籍也稱重至矣庾氏家世南陽聲譽獨步子山父子出入禁闥為梁文人崔航之戰倒徒先奔達才易務任非其器後羈長安臣于宇文陳帝通好請還終留不遣雖周宗好士滕趙賞音築宮虛館交齊布素而南冠西河旅人發歎鄉關之思僅寄於哀江南一賦其視徐孝穆得返舊都奚啻李都尉之望蘇屬國哉子山在梁每一文出京師傳誦初使北方人頗輕之讀枯樹賦始知敬重盛名易地橘枳改觀難為淺見寡聞者道也史評庾詩綺豔杜工部又稱其清新老成此六字者詩家難兼子山備之玉臺瓊樓未易幾及文與孝穆敵體辭生於情氣餘於彩乃其獨優令狐謨史詆為淫放輕險詞賦罪人夫唐人文章去徐庾最近窮形寫態模範是出而敢於毀侮殆將諱所自來先縱尋斧歟

庾子山集總目

序

年譜

本傳

目錄

第二卷 賦

第四卷 詩

第六卷 歌辭

第八卷 啟書

第十卷 讚

第十二卷 銘

第十四卷 碑

第十六卷 誌銘

題辭

世系圖

滕王序

第一卷 賦

第三卷 詩

第五卷 樂府

第七卷 表

第九卷 連珠

第十一卷 教序

第十三卷 碑

第十五卷 誌銘

總釋

文傳

取
補

注釋庾集題辭

倪璠

庾子山咀嚙英華獻飫膏澤上自天監下迄開皇江表一文爭相傳誦咸陽洪筆多出其辭誠藝苑之山嶽詞林之淵府也自滕道撰集於新野魏澹闡注於房陵道之所撰自魏及周著述裁二十卷其南朝舊作蓋闕如也及隋文帝平陳所得逸文增多一卷故隋書經籍志稱集二十一卷其所摭拾者大抵揚都十四卷之遺也澹字彥深鉅鹿下曲陽人稱為著姓世以文學自業專精好學博涉經史善屬文詞采瞻逸為太子舍人廢太子勇深禮遇之令注庾信集世稱其博物隋史列傳具載其事舊唐書志有集二十卷與本傳合要稱其滕王所撰也庾集在於周隋有此二本矣今其書並已不傳世之所謂庾開府集本宋太宗諸臣所輯分類鳩聚後人抄撰成書故其中多不詮次取而注之文集凡十有六卷并釋其序傳撰年譜世系圖二篇有所說漏在於末卷總釋諛聞陋識敢云燕石之瑜摘句尋章自哂貂尾之續舉其大略附之篇首云爾

子山精敏博極羣書史傳贊言尤善左氏觀其序出師之名則靈鈺金僕稱兆亂之子則蓬目狼心星紀庚辰以志亡滅之期紀侯邾子以記出奔之狀車絰覆而馬旋

寧甲裳去而餘皇棄包胥依牆於七日辛有感祭於百年他如走羣望則實沈臺駘致大漸而黃熊赤鳥季氏亡則魯不昌子雅喪而姜族弱組織傳文庾為甲矣自非橫一卷於長頭數平生之極癖何以得此若夫易禮分王鄭之學尚書別今古之文雖家本江南而學遵河北至於九流七略海上名山遊仙步虛則朝浮紫氣參崖經藏則夜落常星莫不言若泉湧思如飈發此又王振金聲大成之集也

九辯九歌濫觴於戰國二都二京浴日於漢朝先之以賈馬王楊申之以曹王顏謝文體亦數變矣至若酈元之注水經楊銜之志伽藍江表似覺遜之夫南朝綺豔或尚虛無之宗北地根株不祖浮靡之習若子山可謂窮南北之勝稱其文詞則安仁伯喈論其銓敘則令升承祚而今人厭薄此體以難於敘事是謂筆筆對仗守一而不變者也子山之文雖是駢體間多散行譬如鍾王楷法雖非八體六文而意態之間便已橫生古趣唐之王後盧前直如虞褚諸家駱賓王差與李嶠等則顏魯公耳至若中晚之單薄宋元之鄙俚漸類墨猪殆又降而益下者與

子山北地羈臣南朝才子若令早還梁使依然英蘭之名不伐江陵永仕中興之國遇合乃所願焉文章蔑云進矣所以屈原宋玉意本牢愁蘇武李陵情由哀怨哀江

南一篇可以知其工矣王司空贈周汝南書感此別離顏大夫著觀我生賦稱其清致史亦並載其文若此賦則又吳蜀在前而子山之為魏國先生也其指南梁則以楚事為辭言西魏多以秦人為喻念護軍而悲濟陽憤正德而詈申子有尚書之多算而事異卧牆有司徒之勤王而身悲逐獵搜神記之五郡兄弟梁家實有其班孝子傳之三州父子南國適符其數喻王琳於陶侃安用借資比鴉仁於顧榮空循偽迹畢昴牛斗原失計於武皇神華龍荒慨無謀於元帝齊秦交惠晉鄭焉依陳人帝而鳳飛岳陽附而天醉石頭去矣建業何路可歸鶉首翦諸江陵無家可寄擬招魂之作魂兮歸來狀七哀之詩哀可知矣

哀江南賦序稱不無危苦之詞惟以悲哀為主予謂子山入關而後其文篇篇有哀悽怨之流不獨此賦而已若夫枯樹銜悲殷仲文婆娑於庭樹叩竹寓憤桓宣武贈禮於楚丘小園豈是樂志之篇傷心非為弱子所賦咏懷之二十七首楚囚若操其琴連珠之四十四章漢將自循其髮吳明徹乃東陵之故侯蕭世怡亦思歸之王子永豐和言志之作武昌思食其魚觀寧發思舊之銘山陽悽聞其笛何僕射還宅懷故周尚書連句重別張侍中藏舟終去並爾述懷元淮南寶鼎方歸猶慙全節曾叨

右衛猶是故時將軍已築仁威尚贈南朝處士徐孝穆平生舊友一見長辭王子珣故國忠臣千行下淚凡百君子莫不哀其遇而憫其志焉若夫三春七夕之章蕩子鴛鴦之賦燈前可出麗人鏡中惟有好面此當時宮體之文而非仕周之所為作也西魏所國本是秦都南梁之伐釁由安定彼既變魏作周此乃遷南事北終年羈旅榮期豈謂樂茲匿怨而臣丘明自然恥此而乃形諸毫翰託擬風騷如擬咏懷二十七首有云惜無萬金產東求倉海君又云移住華陰下終為關外人其悲憤皆此類也昔謝靈運作詩又云韓亡子房奮秦帝魯連恥當時稱其異志是以名士少有自全文章之禍最酷周之世宗高祖滕王趙王才藻所擅既已並麗淵雲披覽之餘豈其獨昏菽麥明時不諱其在此與原其築宮虛館有足稱已江南競寫曾與徐陵齊名河北程才獨有王褒並埒然而青衿初學同時子服之班白首無徒且結桓譚之好徐既未可齊驅王亦安能並駕是以寫片石於溫子餘則無人類一語於吳筠終須削札專標庾氏百世無匹者也乞靈假寵無非操我戈矛異議高談俟爾縱其尋斧文中以為其文夸誕令狐謂之詞賦罪人彼既未許肩隨而乃騁其臆說若夫非劉勰而文心非鍾嶸而詩評品藻

之說人稱屢中踏駁之論予曰未可

輿圖所載在天有星長分野在地有山水陰陽禹貢夏書職方周氏班考地理彪志郡國自此南遊五馬北據黃龍地形自爾剖分州郡率多僞置大抵前承漢魏後歷隋唐以是循求差足彷彿自茲而降多不雅馴若夫山河屢異陵谷幾遷雖使豎亥尋山夸父逐日今之所遊或非古處笨伯之談爭相標榜以為古人某地即今某處驗諸前典正復不然是猶登華嶽者望蓬瀛以為途適於越者指沙漠而為路求其合也不亦遠乎有如稟嵩華之玉石潤河洛之波瀾此時尚住鄢陵居負洛而重世邑臨河而宴安然後遷居新野天關地軸以轉其神華沙起柱飛以志其遷徙刺梁益則漢武求仙郡漢中而劉封失策序其往古之跡也趙王鎮蜀則延閣叢臺魯王平鄴則石閣玉鼓稱其前後所歷也馮翊涼州俱有伏龍崑崙霍山各分天柱言鄂坂而南北異途並遂城而燕韓易地命赤山之秦岱或借天孫比太壹於金陵同稱地肺玉帳明月倡自簡文之作而知其必在江南虎踞龍盤本出張勃之書而或者妄稱蜀志又如張遼赤壁誕九都則疑似之間也目廣漢為長松指睢陽於宋國則今古之別也豫章統以歷陵而稱歷陵之本潯沱在於安平而號安平之河凡此

實費搜求敢云翔實乎

禮記生而命名史傳兼稱小字中朝名宿荀子阿奴南國詞人范曄謝客是以昔時王子比之今我蘭成正如此日司徒對以當年狐偃若使連名引古點鬼之簿何為別體稱今小名之錄已志他如柳名申子青州似彼齊奴立字荀娘文園亦稱天子復有氏彼邑居尊之茅土張封壯武羊邑南城征南鎮北之名護軍尚書之號無非因事推詳本是隨文稱述

賦詩雖取斷章然一句而未盡一篇之文春秋謂之書策有季年而事循元年之例總以觸物而興不必類集一處有如言無鐘者非為襲莒稱襲莒者不說無鐘師興而雨非是圍原三日原降何曾遇雨空尋無射之書輒廢請雨之錄略言其一餘足見矣古人惟取博通後人止尚標竊蚩鄙之習罄竹難書蓋類書盛行於唐宋而非庾氏之所為學也

郊丘本殊袷禘自別昊天之下又有五天而更祀其感生之天四廟之上特立太廟而別立以二祧之廟此周制也宇文氏入關以後尚闕樂聲平荆以還大獲梁器太祖始行周禮武帝初造山雲制作議於盧辯諸人文章出於庾信之手蓋當時上遵

鄭氏河北之學徐遵明之遺訓也若夫七世之說本是王肅之改稱九廟之制亦自劉歆之詔說嘗案古文尚書如左傳所載杜氏稱逸書者真古文也餘皆諸子之學呂氏春秋云商書曰五世之廟可以觀怪萬夫之長可以生謀高誘曰逸書喻山大水大生大物廟者鬼神之所在五世久遠故於其廟觀物之怪異也按逸書如此自漢以後皆習今文尚書孔安國所注古文遭巫蠱不傳肅黨託言出自皇甫謐家改易此文以資難鄭若果七世觀德咸陽市門千金其兩致乎肅之妄也若夫三廟不毀與四親廟而七惟周始有其數漢武喜功實為流毒博而篤矣予師韋公劉歆取殯葬之期以應廟數宣云得禮王肅本此諛言遂謂高祖之父高祖之祖共七廟而九歆惟滋一時之議肅則亂萬世之經後周憲章其功大矣六卷之文或載辯於弁首或附議於篇末無非本諸經疏未敢肆其筆端者也

魏釐之冢舊闕殘編魯公之壁間多爛簡其或字本舊遺義存原闕至有虛虎三書魯魚一變或音同而字異或半類而全非如二王二郤三清四說謝中郎譏佞佛佞道本是二何舍利弗為大事因緣殷勤三請乃有訛為二王之音易以三清之字胡組而書故組任咸而誤任延廣漢流渥豈云廣莫之都枝江有碑不混板楯之弩雖

還原字仍定正文其或疑不能判並皆抄內以備異聞若乃紕繆顯然亦必矯正以懲其誤至於一事所出諸書並載或此詳而彼略或先源而後委要欲處處見之非關重複也又有一姓雙名兩人同地京兆有邊鳳繼踵或者即是子韶塞庫本王季所因此鄉亦留箕子今雖無考古或有書諸所擬詞愧云篤論即如蔚宗作書之始兩漢自有諸家唐皇稱制以前二晉各有數本先後既多異同彼此互分詳略書之不傳亦有命也予嘗於十七史之外欲遍勒諸史別部荀悅袁宏以下惜未盡得其本望中郎之盡與是所愧心假石瓊於鄰人庶幾免矣

秦儒出谷金鏡又以數亡漢簡吹灰珠囊幾經重理考藝文於漢志或有未識其名驗經籍於隋書焉能盡存其本況復東宮抄撰麟趾校書俊邁絕倫羣書博覽求之當世未窺半豹之斑豈有後人翻識全牛之體百川皆到非容測蠡而知五技易窮不過滿腹而止諸所闕疑自安疎陋者也



男灝次淳校

庾子山年譜

錢唐倪璠魯玉編

梁武帝

梁書本紀曰帝諱衍字叔達小字綽兒姓蕭氏與齊同承淮陰令整之後齊明帝崩遺詔以帝為都督雍州刺史永元三年二月帝發襄陽十二月斬東昏南康王即位進帝位相國總百揆封十郡為梁公備九錫之禮進爵為王齊帝下詔潭陵位天監元年夏四月即位於南郊在位四十九年崩尊為武帝廟曰高祖葬於修

天監十二年 癸巳

武帝即位之十二年也陸倕新刻漏銘曰天監六年大歲丁亥哀江南賦稱太清二年為戊辰知是年歲在癸巳又以滕王逋序已亥年六十七歲逆數之信當以是年生

天監十三年 甲午

秋七月立皇子綸為邵陵王繹為湘東王紀為武陵王隋書地理志梁武帝除暴甯亂奄有舊吳天監十三年有州十三郡三百五十縣千二百二十二其後務恢境宇多有析置至大同中州一百七郡縣亦稱於此

天監十四年 乙未

天監十五年 丙申

是歲魏明帝
詡熙平元年

天監十六年 丁酉

春詔織錦者不得為仙人鳥獸之形以其裁翦有乖仁恕宗廟牲牢皆代以麋薦用蔬菓朝野喧囂以為宗廟去牲乃是不復血食帝終不從按武帝溺情釋教實起於此

天監十七年 戊戌

天監十八年 己亥

夏帝於無碍
殿受佛戒

普通元年 庚子

是歲魏正
光元年

普通二年 辛丑

普通三年 壬寅

普通四年 癸卯

是年簡文帝以晉安王為雍州刺史信父肩吾為晉安王國常侍王每從鎮肩吾常隨府在雍州被命與劉孝威等十人抄撰眾籍豐其果饌號高齋學士

普通五年 甲辰